


Aruba Dushi Tera

Fontein

E cas di Fontein renobá.



E storia di Fontein ta cuminsa cu e hoben Borris Croes, kende a sali di Hulanda riba un barco pa bin busca su futuro aki banda. Fuera di algun paña, su unico rikesa tabata su bukinan, for di cualnan el a siña papia diferente idioma. El a biaha bin Curacao, caminda ya tabata tin hopi hulandes ta biba. Borris a traha y a casa na Curacao. Pero desde cu su casá a fayeré, e kier a bin biba na Aruba. Asina Borris a bin establecé su mes na Aruba hunto cu su jiu muher Maria Elizabeth, cariñosamente jamá Mita. Mita ya tabata viuda di Cravenhorst y el a laga su jiu, Harry, na Curacao cerca famianan p'e por bai scol. Na Aruba Mita ta bolbe casa cu Jean Oduber y ta haya 3 jiu muher.

Na Aruba, mescos cu na Curacao, e tempo aya tabata tin un sistema di otorgá tereno na e pueblo. Pero e grandinan por scoge promer y despues e chikitonan por scoge.

Claro cu esnan cu scoge promer ta busca e mihor lugarnan di e isla.

Ya cu Borris tabata un di e grandinan, e tambe por a scoge promer. Pero e sí a sinta pensa prome ta kiko lo combiné. Segun Borris cu mester por tin un lugar caminda tin un fuente di awa. Ki bal un tereno sin awa. Asina el a manda su tres trahadornan bai busca caminda tin un fuente. Despues di dos dia di subi y baha ceronan nan ta jega na un boca cu bunita ceronan di santo blanco.

E tres trahadornan ta mira band'i zuid y aya tin un baranca straño, pero bunita. Nan a bai na e baranca y a siguié te cu nan a bin topa cu un spelonk. E mesun spelonk caminda despues di tempo hopi hende tabata scribi nan number na entrada y hopi hende kier drenta aden. Pero algun ta bisa cu tin hende cu a drenta y nunca mas nan a sali.

Pazuid di e baranca tabata tin un cantidad di palonan di druif grandi. Esun mas bieo a bisa cu ey mester tin un fuente, e fuente cu Shon Borris ta soña cuné. Y berdad! Nan a jega bao di palonan di druif y a mira un buraco


manera un tanki jen di awa kristalina. Ora nan a midi con hundo e ta, nan a ripará cu e ta mas cu 6 pia hundo. Nan a purba e awa y esaki tabata dushi. Cu e bon noticia aki nan a bolbe cerca Shon Borris.

Borris tabata sá cu mester por tin un fuente na algun parti di e isla y su soño a wordo realizá. E mes a bai cu su trahador mas bieo pa mira e lugar. Jegando na e boca di laman cu e seronan bunita di santo blanco, Borris a cuminsa pinta un mapa. Alavez el a duna e boca ey un nomber di clase pa su belleza y a jamé "Boca Prins".

Tambe el a pinta e baranca grandi te na e fuente di awa. Despues el a sak purba e awa y a keda keto. "Esaki ta e fuente cu semper tabata den mi pensamiento. Lo mi jamé Fontein!" Riba su mapa el a pinta e tera cu e lo bai pidi, pero e no a indicá cu tin un fuente eyan.

Cu su mapa den man Shon Borris a bai pidi su tereno y pronto el a hayé tambe.

Promer cos cu el a traha ta un caminda pa jega Fontein. Despues el a traha un trankera cu e piedranan, cu laman a trece tera, tur rond di e tereno di Fontein. Tambe el a planta mas mata di druif y mata di mangel pa wanta e biento ora e cuminsa planta.



E fuente di awa bao di palonan di druif.

Fontein

Cu yudanza y siguiendo e consehonan di su tres trahadornan Borris a planta Fontein. Pero e mes no a disfrutá mucho di su trabao, pasobra el a fayese algun año despues.

Su unico heredero tabata su unico jiu Mita.

Mita tabata tin 4 jiu. Di esakinan ta un so tabata stima Fontein y a biba aya. Tabata

Susana Clementina, jamá Chancha. Chancha a traha duro pa manetené Fontein un lugar bunita y fertil. Hopi tabata e hendenan cu tabata bishitá Fontein. E tabata traha boelet di cocolishi masha bunita y tabata bendenan cu e barconan - "brieknan" - cu tabata bin den waf na San Nicolas. Tabata Chancha tambe cu a traha e cas cu tin na Fontein. Chancha a casa cu un hende di barco, un tal Hubles, pero e matrimonio aki no a dura. Su prome jiu - un mucha homber - a muri na chikito y despues el a haya un jiu muher, Maria Graciela. Esaki a wordo batisá na año 1892.


Dia 12 di maart di 1914 Chancha ta fayese. Su unico heredero tabata su jiu Maria Graciela, jamá Chea.

Chea ta biba na Fonteyn te cu su 24 año, es decir te rond di año 1916.

Dia 4 di november di año 1924 Fontein ta wordo bendí cu Sr. A. Lacle pa e suma di 2.100 florin.

Durante e decada di cincuenta, Fontein tabata un plantacion grandi di berdura cu tabata wordo maneha door di chinesnan. Tambe hopi scol tabata haci excursion pa e lugar bunita ey, sea ta pa mira e plantacion, pa bishita e

cuevanan of pa mira un fuente natural caminda semper bai awa fresco tabata core y muha tur e matanan. Despues a bin un tempo cu Fontein a bai atras. Pero ultimamente - cu bishita di La Reina - nan a renoba e cas y haci un limpieza formal na e lugar bunita aki, na unda cu te awe ainda e fuente, cu tabata e soño di Shon Borris Croes, ta sigui core y core.....



Bista di entrada di Fontein cu Chinesnan (foto cortesía: Archivo Histórico Nacional).

Bista di e cueva cu bishitantenan na 1931.


Cu gradicimento na Sr. Theodoor Dañe (bisanieta di Borris Croes) pa a presta nos su manuscrito di "Historia di Fontein".



No djies pidi
un refresco...
Pidi un...



PEPSI



E refresco pa e generacion nobo!



CHABALITO

Number 5 - Año 2 - January, 2000 - Afl. 2,=

